

# KERATAN AKHBAR

TARIKH : 18 OKTOBER 2022

AKHBAR : HARIAN METRO

MUKA SURAT : 22

## Rancang tambah baik data inflasi

### Rancang tambah baik data inflasi

Putrajaya: Jabatan Perangkaan Malaysia (DOSM) merancang untuk melaksanakan statistik perbelanjaan dan kadar inflasi yang lebih menyeluruh dengan mengambil kira pelbagai peringkat umur tertentu bagi menyediakan dapatan lebih spesifik.

Ketua Perangkawan, Datuk Seri Dr Mohd Uzir Mahidin berkata, pihaknya akan mengambil pendapatan dari golongan muda, dewasa dan pencen selain menggunakan pendekatan sedia ada yang digunakan sekarang.

Katanya, pendekatan ketika ini hanya menggunakan had pendapatan tertentu untuk menilai pola perbelanjaan yang memiliki hubungan kait dengan penetapan kadar inflasi di peringkat nasional atau negeri.

"DOSM bercadang untuk mengeluarkan statistik lebih menyeluruh dengan mengambil kira corak perbelanjaan warga tua dan muda bagi mendapatkan angka kadar inflasi yang lebih spesifik.

"Memang ada proses tertentu dari segi pengiraan yang kita gunakan dan sekarang kita sedang melaksanakan kajian mengenai pola perbelanjaan rakyat Malaysia.

"Oleh itu,



“  
Kami akan buat pengiraan mengikut had umur  
Mohd Uzir

kami akan buat pengiraan mengikut had umur kerana corak perbelanjaan warga tua berbeza dengan muda dan ada baru keluarga.

"Sebagai contoh, ketika ini kami menggunakan had pendapatan RM3,000 ke bawah. Jadi, dengan menggunakan pendekatan lebih komprehensif, ia akan menghasilkan data yang lebih baik.

"Ia boleh dilaksanakan dengan menggunakan metodologi tertentu," katanya sempena sambutan Hari Statistik Negara (HSN) dan Sambutan Sedekad Institut Latihan Statistik Malaysia (ILSM) secara maya di sini, semalam.

Sementara itu, mengenai HSN, beliau berkata, sambutan sejak 2017 itu adalah untuk meningkatkan kepentingan statistik sebagai asas kemakmuran kehidupan bermasyarakat dan negara.

Mohd Uzir berkata, HSN dilihat dapat meningkatkan kesedaran dan kefahaman dalam kalangan komuniti mengenai kepentingan statistik negara.

Menurutnya, HSN disambut untuk mengiktiraf sumbangan ahli statistik di Malaysia terutama dalam pengurusan statistik rasmi berdasarkan asas perkhidmatan, integriti dan profesionalisme serta dapat memperkukuhkan lagi kerjasama dengan pihak berkepentingan khususnya bagi proses pengumpulan data.

Beliau berkata, impak HSN adalah dapat mendedikasikan DOSM sebagai agensi pusat hab data statistik dengan fokus memberi kesedaran dan kefahaman tentang statistik kepada masyarakat sama ada agensi kerajaan, swasta dan awam.